

Lepran De Pool Ran Nen Galati Mo

¹ Wen Pool, laalep Jesu Kristi, de baa a gurun mo pet an koo a me gwar pet an, dang nə le kə nghan dee a laalep wur kas, dangbe a shi rəbet Jesu Kristi, kə Naan puun, dewur yool kə Jesu a peemúut.

² Dyemnaa de mo ashak kə wen, moo lep tokshik fur mo shindəm pə nendəm ndang Naan (Ekəlisya) de mo ndəən yil nGalati.

³ Naan puun kə Daa fun Jesu Kristi mo naa wun shi yit mə naajeel, kə mo shin tongryang nwun zak.

⁴ Jesu Kristi wur shín shin mbə shikbish fun mo, mbəkə wur bam mun de ndəən bit debish desə mo, nciit-nciit kə rəbet kə Naan puun fun.

⁵ Dedes dee pə wur mbe ngaa-ngaa kə ngaa-ngaa. Nə aasə.

Pwoo Deret Nə A Məndong Bejee Dak

⁶ Nə aapwoo nwen zam, mbəde wu ciir wu cii ngwe dewur pet wun shi yit naajeel mə Kristi kələk-kələk aasə, mbəkə wu shindəm de ndang mee pwoo Naan decì.

⁷ Azeen-nzeen baa mee pwoo deret waa dee de, de nə waa met de wuu kələng pə ghan de kas. Dang pak gurun moo daampee nwun, kə mo rəbet ciir kə pwoo deret mə Kristi nə.

⁸ Dangbe koo de a mun, jir de a mee ngulep Naan tong a dengnaan sham, dangbe wur sat mee

pwoo deret de nwun, dyik kə mbii de mu ten mu sat nwun, be gwar mənə dee a mbii debuu-buu mbə vit.

⁹ Kaade mu ten mu sat sə, an kən baa nsat de nənnee. Katdang mee ngusatpwoo deret de nwun dyik kə de mu ten mu sat nwun, be wu yit kə ngwar mənə dee ndər tuup Naan mbə vit.

¹⁰ Wu pan nee, an kən tang a dedes pə gurum mo de aa? Aa koo a pə Naan di yi? dang wu pan nee, an tang a tong dyen ngurum mo ghe? Katdang de an kən tang a tong dyen ngurum mo, be de baa an a kərem Kristi kas.

A Naan Pet Pool Dee A Laalep

¹¹ Dyemnaa mo, dyen wen kə wun man nee, pwoo deret de gyet wen kən sat nwun, baa nə put a pə mee gurum di kas.

¹² Mbəde, baa gyet wen nla nə a nsar mee gurum kas. Kəzak, baa a mee gurum kám nə nwen kas, a Jesu Kristi shikáa wur, wur woo nə nwen.

¹³ Wu kələng pwoo nkaa shiimwaan fen, de gyet nyam, ndəən seyil nNaan mə nen Yahudi mo, mbít mənə, be wen shínjeel Ekəlisya Naan mo hakyeng, mbe gyet wen kən gung mbəkə nghan tu nə di.

¹⁴ Gyet ndəən gang fen mo, be wen met mmo jir, mbə mwaan ndəən rat nen Yahudi mo. Gyet wen cín zuur mbə mwaan ndəən wàar puun fen de moo ten murep mo.

¹⁵ Dangbe Naan dewur ten bələp an yam-yam, akudang moo làa an, be ndəən deret wur, be wur pet ghan mbəkə wen dee di a mə wur.

¹⁶ Be nə ret nNaan wur nyit be wur kám Làa wur nwen, mbəkə nghan sat pwoo deret de nkaa

wur, nen de baa mo a nen Yahudi mo kas. Baa gyet wen beet mənə kə mee gurum kas.

¹⁷ Kəzak, baa gyet wen kàa nJerusalem, pə jeplep Jesu Kristi mo de kas, de gyet wur shee pərep mo baadang wur pet an. Dangbe wen dəm nyil Arabiya, abwoon mənə be wen waa mbaa dəm nDamaskus.

¹⁸ Abwoon bit mo kun, be wen kàa nJerusalem, mbəkə nghan naa Kefas di. Wen tong ashak kə wur mbee teer mo kaapaat baapaat.

¹⁹ Baa gyet wen waa nkaat kə memee ndəən jeplep Jesu mo kas. Gyet wen kaat aa Jemis dyemnəən Daa, bejee dak.

²⁰ Ntoom Naan, be mbii de wen ran nwun, baa mo a dung kas.

²¹ Abwoon mənə, be wen ndəm nkwang yil nSiriya kə Silisiya.

²² Baa gyet nendəm ndang Kristi de mo ndəən Judiya nə mo man wen kas.

²³ Moo kələng a gurum mo nkaa sat nənee, <<Gwar de də wur shínjeel mmun sə, yaksə be wur nkaa satpwoo ngurum mo nkaa shinzeen de gyet wur gung mbə tu nə.>>

²⁴ Mo kwoop Naan mbə an.

2

Jeplep Jesu Mo Lap Pool

¹ Abwoon bit mo kaapaat baafeer, be wen mbaa nkàa nJerusalem, ashak kə Barnabas. Gyet wen mang Titus mpan di.

² Wen kàa nJerusalem nə, a mbəde Naan woo nwen nə, nkàa di. Gyet nciit kə mənə, be nkaat

kə nen denan-nan nə mo a səsok, mbəkə wen sat di mmo, nkaa pwoo deret de wen nkaa sat nə nen de baa mo a nen Yahudi mo kas. Mbəkə taji, dak de gyet wen cin nə kə de wen nkaa cin yool dee a buu kas.

³ Dangbe Titus, dewur ashak kə wen, jir dewur a ngu Heleni, be baa gyet mo letəng nwur, kə mo can nwur di kas.

⁴ Dang pak nendəm ndang Kristi de mə dung sə mo, mo tap ji del ndəən mun, kaa nengwol mo sə, mbəkə mo tap gwol mun, kə mo katpee de mbut mun, de mun ndəən Kristi Jesu, mbəkə mo le mu dee di a kərem fur mo.

⁵ Baa gyet mu shínpee mmo kas koo dāben, mbəkə mu tap de kə zeen mə pwoo deret nə de mbə wun.

⁶ Dangbe mbə nen de mo lekāa fur mo a kaa mee mbii sə, koo de mo a wii mo yi, be baa nə daampee nwen kas. Baa Naan wur shwatyt mme gurum kas. Nen de kən sat mmo, koo de gyet mo a nen denan-nan mo, dangbe be jir kəsə, be baa gyet mo le mee mbii dyik nkaa pwoo fen nə kas.

⁷ Akoppee mənə bə mo naa nə, Naan wur cin dak mə satpwoo deret nə nen de baa mo a nen Yahudi mo kas nsar fen, kaade wur cin dak mə satpwoo deret nə mPita mbə nen Yahudi mo sə.

⁸ Be mo naa nənee, << Naan dewur shinbal mPita, mbəkə wur dee de a ngusatpwoo deret nə nen Yahudi mo, a wur shinbal nwen zak, mbəkə wen dee di a ngusatpwoo deret nə nen de baa mo a nen Yahudi mo kas.

⁹ Kaade mo naa deret de Naan wur cin nwen, Jemis kə Pita, kə Joon, de gyet mo a nen nan

mə nendəm ndang Naan nə mo, (Ekəlisya) nə, mo shin sarse fur de mə shaarshak nwen, kə Barnabas. Mo sat nə, mmun mu dəm mu satpwoo Naan nə nen de baa mo a nen Yahudi mo kas, kə nwudun, du dəm de pee nen Yahudi mo.

¹⁰ Mo sat mmun nee, taji mu mundər nenjeel de mo ndəən mo kas, a mbii de gyet kən fes le pətuup fen mbee cìn nə mənə.

Pool Gwak Pita nYil Antiyok

¹¹ Dang kaadi Pita gyet kàa nAntiyok, be wen shin sar wur nyit, mbə mbii de gyet wur cìn nə baa nə nkaa ar kas.

¹² Akudang pak gurum mo tong pə Jemis jì de, be wur kə sese ashak kə nen de baa mo a nen Yahudi mo kas, dangbe kaade des desə nə mo jì wul, be wur cii sese ashak kə nen de baa mo a nen Yahudi mo kas, mbəde wur kəər nen Yahudi mo.

¹³ Ashak kə wur, be koor nen Yahudi de mo a nendəm ndang Jesu mo, baa mo dar nkaa zeen kas, kaa wur sə, dang kə Barnabas zak, wur mbwoon mo ndəən mwaan mo kə pətuup de vəl-vəl nə.

¹⁴ Dang kaade wen naa mənə, baa mo dar ndəre-ndəre nkaa zeen mə pwoo deret nə kas, be nsat mPita, nnaar mo nənəe, <<Katdang waa de waa a ngu Yahudi aa tong a kaa ngwe de baa wur a ngu Yahudi kas, be cirang dangbe gha nle təng nen de baa mo a nen Yahudi mo kas, kə mo tong kaa nen Yahudi mo sə yi?>>

Gurum Mo Kat Bam A mBə Shinzeen

¹⁵ Mun shikáa fun, mo làa mun a nen Yahudi mo, baa a nen shikbish kaa koor gurum mo sə kas.

¹⁶ Dang mu man nee, baa gurum kə dee a dəbang nyit Naan, a shi dak dewur cìn ndəən Wàar mo kas, dangbe gurum kə dee a dəbang, a mbə shinzeen ndəən Jesu Kristi. Har mun, mu shinzeen ndəən Kristi, mbəkə mmun dee di a dəbang shi shinzeen nKristi, baa a shi mee dak de mu cìn ndəən Wàar nə kas. Mbəde, shi dak de gurum cìn nə ndəən Wàar nə, be baa gurum ncam dee a dəbang nyit Naan kas.

¹⁷ Dangbe muu gung kə mun dee de a dəbang ndəən Kristi. Katdang mo waa kat a mun a nenshikbish mo, be nə kám nə, Kristi wur a mee ngulep mə shikbish aa? Hai baa aasə kas koo daben!

¹⁸ Dangbe katdang wen kən dyik, a nkaa mbii de wen kən ten nshirip mo, be kən kám káa fen agaak nə, an a ngushikbish.

¹⁹ Wen kən dee a demumuut ndəən Wàar nə, mbəkə wen tong de kə seen pə Naan de.

²⁰ Mo pwás an ashak kə Kristi. Baa a an kən tong ndəən seen desə kas, dangbe a Kristi wur kə tong ndəən an. Kə seen de wen kə nə yaksə ndəən an desə, an kən tong a shi shinzeen ndəən Làa Naan, dewur wal nwen, dang wur shìn kaashin mbə an.

²¹ Baa wen cii deret Naan kas, mbəde katdang gurum kə dee a dəbang nyit Naan, a shi Wàar mo, be muut de Kristi wur muut nə, nə ndee a buu mənə be baa nə kə mee koop nə kas.

3

Gurum Kə Kat Bam A Shi Shinzeen nJesu Kristi

¹ Hai! Wun nen Galati mo, wu mwen zam. A soot dedang kə se but nwun yi? A yit fuu mo, be mo sat nwun agaak kaade mo pwas Kristi.

² Wu dar kə wen cìn mee tal de pə wun. Gyet wu lap Riin nə a mbə dak de wu cìn ndəən Wàar nə aa koo a mbəde gyet wu shinzeen yi?

³ Wun wu mwen aasə wo? Gyet wu shee wu yaa a ndəən Riin, dangbe yaksə, be wuu rəbet kyes nə a ndəən nan fuu mo aa?

⁴ Tan wu shwaajeel kə mbii mo shini-shinə a buu mənə aa? Taji wu yit kə nə dee a debuu kas.

⁵ Wur dewur shin Riin wur nwun, kə wur cìn mbii aapwoo mo ndəən wun, be wu pan nee, a mbəde wuu tap kə Wàar nə mo aa koo a mbəde wu kələng, dang wu shinzeen pwoo deret nə yi?

⁶ Wu cìn pan nkaa Abraham, kaade pwoo Naan nə sat sə nənee, <<Wur shinzeen nNaan mbə mo tang mənə wur a kaa ngwe de ndəre sə.>>

⁷ Mbəmənə, be yaksə, wu naa a nenshínzeen mo a jep Abraham nə mo.

⁸ nDəən pwoo Naan, be mu ten mu naa nə, Naan wur le nen de baa mo a nen Yahudi mo kas, kə mo dee a debang nyit wur a mbee shinzeen. Mo satpwoo deret desə nə mbít mə Abraham nənee, <<A ndəən waa be gurum mo jir, ndəən nyil nə mon nkat deret.>>

⁹ Nə aasə be, nen de mo shinzeen, mon nkat deret ashak kə Abraham, mbəde gyet wur kə shinzeen.

¹⁰ Nen de moo le pətuup fur mo, a nkaa dak Wàar nə, be mo a ndər tuup Naan. Mo ran ndəən bəət

haal Naan nānee, <<Koo a wii de baa wur gam Wàar de mo ran mo ndāen bāet haal mā Wàar nā kas, be gwar mēnā a ndār tuup Naan.>>

¹¹ Yaksā, nā dee agaak nā, baa mee gurum mak dee a debang nyit Naan shi Wàar mo kas. Mbāde koo a wii, dewur dee a de ndāre a mbā shinzeen wur, be a wur nkat seen.

¹² Dangbe baa Wàar nā dar a nkaa shinzeen kas, <<Koo a wii dewur ngam Wàar nā mo, be gwar mēnā wur nkat seen a shi mo.>>

¹³ Mun jir, mon ntokdyeel debish mun, mbāde baa mu gam Wàar nā mo jir kas, dangbe Kristi, wur can mun ndāen dyeel debish nā. A mbā mun, be wur shwaajeel fun mo, dang wur mang dyeel debish nā le nkaa shin. Nā a rāran ndāen bāet haal Naan nānee, <<Koo a wii, de mo pwas wur nkaa tēng, be wur a ndār tuup Naan.>>

¹⁴ Mbākā ndāen Kristi Jesu, be deret mā Abraham nā dee nkaa nen de baa mo a nen Yahudi mo kas. Kēzak, mbākā mun mu lap Riin de Naan wur kā ten cweer nā nnā, wudin ncin mmun mbā shinzeen fun mo.

Wàar Kā Pwoo De Naan Kā Ten Cweer Mo

¹⁵ Dyemnaa mo, an ncin kām kā mbii de mu ten mu loot kā mo ndāen tong fun mo shidaar-shidaar. Katdang gurum mo vėl moo ten bwootpwoo ashak nkaa me mbii, be nā nluk kā mee gurum dyik teppwoo de mo kā ten bwoot nā, kēzak, baa mee gurum mak le mee mbii de nkaa nā kas, mbāde mo kā ten bwoot nā.

¹⁶ Nā aasā, Naan wur kā ten cweerpwoo mo Abraham yam-yam kā dang wur. Baa mo ran a nee kā dang wur mo kas. Katdang de mo sat nee, a dang wur mo, be de nā kām nā, dang nā mo a des,

đangbe mo ran a nkaa dang wur mǎndong bejee. Dang wur demǎndong desǎ nǎ a Kristi.

¹⁷ Mbii de an nkaa sat nǎ a nee, gyet yam-yam, be Naan wur kǎ ten bǎlemcuk shi toom. Dangbe abwoon bit mo kambil feer kǎ laarkun, aku dang Naan wur shin Wǎar nǎ nen Yahudi mo. Wǎar de Naan wur shin desǎ nǎ, baa nǎ mak teppwoo de gyet wur kǎ ten cweer nǎ kas, kǎzak, baa Wǎar nǎ mo mak tupwoo de Naan wur kǎ ten cweer mo kas.

¹⁸ Katdang de Naan wur shin zuum wur ngurum mo a mbǎde moo tap Wǎar nǎ, be de baa gurum mo nkat zuum wur nǎ a mbǎ pwoo de Naan wur kǎ ten cweer nǎ kas. Dang mu man nee, a mbǎde gyet Naan kǎ ten cweer nǎ, dangbe wur shin zuum nǎ Abraham.

Naan Shin Wǎar Wur mMun

¹⁹ Dang, a mii a koop Wǎar nǎ yi? Naan wur shin Wǎar nǎ mo, a mbǎkǎ mmun man mbii đebish mo đĩ. Gyet Naan wur shin Wǎar nǎ mo mmun, a mbǎkǎ mo tap mun đĩ, mbǎ reppee lee, be parde pee nǎ wul, mbǎkǎ dang Abraham nǎ jĩ đĩ. Mbǎde Naan wur kǎ ten cweerpwoo mǎnǎ a nwur. Naan wur shin Wǎar nǎ a nnenlep wur mo, mbǎkǎ mo sham shin đĩ nsar mee gurum de gyet wur a ngu ar nnaar Naan kǎ gurum mo.

²⁰ Katdang ngu ar de mbut mee mbii, bǎ nǎ kám mmun nǎ wur đar a naar gurum mo vǎl. Dang ndǎen pwoo de gyet Naan cweer Abraham nǎ, be gyet a Naan wur mbǎshin bejee, de gyet wur cweerpwoo mǎnǎ.

Shii Wǎar

²¹ Kyet desə nə kám mmun nə, Wàar nə a nkaa koon kə pwoo de Naan wur kə ten cweer nə wo? Baa nə aasə kas koo dəben. Katdang gyet mee Wàar nə de, de gyet nə mmak shìn seen ngurum mo, be gyet nə mmak le gurum mo dee a de ndəre nyit Naan. Dang baa mee kaan Wàar mənə dī kas.

²² Dang kaade mo ran ndəən bəət haal Naan sə nee, mbii de mo ndəən nyil nə jir, mo a ndər shikbish. A nen de mo shinzeen nJesu Kristi, mo lap mbii dī Naan wur kə ten cweer nənee, wudin shìn nen de mo shinzeen Kristi bejee.

²³ Gyet akudang shinzeen nə jì, be mun a de shishoot ndəən Wàar nə, aku dang Naan wur wang ar mmun, kə mu shinzeen dī nJesu Kristi.

²⁴ Mbəmənə, be gyet Wàar nə a ngukám fun, akudang Jesu Kristi wur jì. Kaadi wur jì be mu dee a dī ndəre nyit Naan, mbəde mu shinzeen wur.

²⁵ Dang nyaksə, kaadi Naan kə wang ar nə mun, mbəkə mu shinzeen de Jesu Kristi, be baa mu kudi a ndər ngupan mun kas.

²⁶ Mbəde yaksə bə shinzeen, ndəən Jesu Kristi, be wun a jep Naan mo jir.

²⁷ Wun de moo cìn baptisma nwun jir ndəən Kristi, be wuu dee a debəbal kə Kristi mənə. Mbəmənə mu mwaan ndəən dyen mə Kristi.

²⁸ Yaksə, baa mee shwatyit kudi nnaar nen Yahudi mo kə nen de baa mo a nen Yahudi mo kas, koo naar kərem kə jeplu mo kas, koo nnaar mish mo kə mat mo kas, mbəde wun a deməndong jir ndəən Kristi Jesu.

²⁹ Katdang wun a mə Kristi, be wun a jep Abraham mo. Wuu lap mbii mo jir, de gyet Naan wur kə ten cweer nə.

4

¹ Mbii de an nkaa sat nə a nee, làa dewur nsekop, baa wur met kərem kas, naar dewur kuđi a làa, jir kə de long nə mo a mə wur.

² Kaadı wur kuđi a làa, be a gurum moo tap wur zak. A gurum moo naa mbii wur mo, har parpuus de puun wur le nə wul.

³ Nə kə mun aasə zak. Gyet nyam, naar de gyet baa mu manshii zeen kə mbii mo kas, be gyet mun a kərem mon ndər Wàar kə mbii de gurum mo loot kə cìn mo, de mo nyil desə mo.

⁴ Dang kaadı pee nə wul tyap, be Naan wur lep Làa wur sham ndəən nyil desə. Mo làa wur a kaadı mo kə làa gurum mo sə, ndər Wàar.

⁵ Mbəkə wurang nen de mon ndər Wàar nə đì, mbəkə wur le mun dee de a jep Naan mo.

⁶ Mbəde wun a jep wur mo yaksə, be Naan wur lep Riin kə Làa wur sham ndəən pətuup fun mo. Riin nə wur petpee shibal nee, Daa puun!

⁷ Yaksə, be ndəən Naan, baa wu kuđi a kərem mo kas, dangbe wun a jeplu mo. Katdang wu dee a jeplu mo, be wun nsekop kə mbii de Naan wur ncìn nə jep wur mo.

Pool Pan Nen Galati Mo

⁸ Gyet nyam, be baa wu man Naan kas, be gyet wun a kərem mo ndər riin de baa mo a naan kas.

⁹ Dangbe yaksə kaadı wu man Naan sə, koo kaadı Naan kə man wun sə, be cirang dang wun ciir kəbwoon nNaan, kə wun waa wu baa wu dəm de ndang Wàar kə mbii de gurum mo loot kə cìn yi mə riin de mo nyil desə baa moo mee bal kas yi? Dyen nwun kə wu baa wu dee de a kərem mo zak aa?

¹⁰ Wuu tap kə teer mo, kə puus serəbet mo, kə tar mo, kə pak teer mo ndəən bit nə.

¹¹ Dangbe wu shin kəərmuut taji ɗak de gyet wen cìn pee wun, nə yool dee a ɗebuu.

¹² Dyemnaa mo, an kən ɗang pee wun, kə wu dee kaa ghan sə. Kaadi ghan kən dee kaa wun sə. Baa wuu cìn mee mbii ɗebish nwen kas.

¹³ Wu man nee, gyet a wen shee jì kə pwoo ɗeret nə nwun. Mbii de gyet nə le ɗang wen tong pee wun de, a mbəɗi baa gyet wen nkoom kas.

¹⁴ Koo de gyet shwal nə daampee nwun, bə baa wu cii an kas, kəzak, baa wu ɓak an kas. Dangbe wu lap ghan shi pətuup məndong kaa wuu lap a mee ngulep Naan sə. Gyet wu lap ghan a kaa Kristi Jesu shikáa wur sə.

¹⁵ A nee, retnyit de gyet wu cìn ashak kə wen sə, nə a nii? Mbəde wen sat nwun azeen, katɗang de a mbii de nə mmak cìn, be ɗi gyet wun shwatyit fuu mo wu shìn nghan.

¹⁶ Cirang ɗangbe wen mbə ciir ndee a shaarlek fuu yi? Mbəde wen sat zeen nə nwun aa?

¹⁷ Nen de mo nkaa cìn ɗung nwun sə mo, moo gung a mbəkə mo kat ɗeret de nyit fuu, ɗangbe mbii de nə le ɗang mo rəbet cìn kəsə nə, baa nə ret kas. Mo rəbet a kə wun ɓàkshak de kə wen, mbəkə wu kələng a mo ɗi bejee.

¹⁸ Katɗang gurum mo tap shak a mbee mbii ɗeret, be nə ret zam. Desə nə azeen-nzeen, koo a pərangyi. Koo de ghan ashak kə wun, koo de baa ghan ashak kə wun kas, be wen kən pan wun.

¹⁹ Jep fen de kən wal nwun sə mo, ghan a kaa mat de war nkaa shwaajeel mbee làa-làa sə. Wen

nsat a nshwaajeel nə ɗak, har pardfi məse fuu dee nciit-nciit kə mə Kristi.

²⁰ Dyeen ghan ndəəm pee wun de zam, mbəkə nghan man ar de an nsat mbii desə mo de nwun. Yaksə, baa wen man mbii de an nsat nwun kas. Mbii nə daampee nwen nkaa wun zam.

Kám Shi Seera Kə Hagar

²¹ Wun nen de wu sat nee, wun a ndər Wàar nə mo. Wu sat nwen yaksə, wu kələng mbii de Wàar desə nə mo nkaa sat nə aa?

²² Mo ran ndəən bəət haal Naan nənee <<Gyet Abraham kə jep demish mo vəl. Gyet nəən memee war a kərem, kə nəən devəl nə, baa war a kərem kas.>>

²³ Dangbe mo làa-làa kə mat de gyet war a kərem sə, ndəən nan, dangbe làa mat de gyet baa war a kərem kas sə, mo làa wur a nciit-nciit kə pwoo de gyet Naan wur ten cweer nə Abraham.

²⁴ Pwoo desə nə mee mbiikám dejurum de but. Mat devəl desə nə mo, mo dee a kaa cweerpwoo shi toom mo vəl sə, de gyet Naan wur sat nə mo. Hagar a mat de war a kərem sə, war dee a səmpwoo de Naan wur cweer nə mMosis nkaa jwak Sinai. A war de war làa-làa mo be mo dee a kərem mo.

²⁵ Hagar war dee a səmpwoo kə jwak Sinai de nə nyil Arabiya. War dee a kaa Jerusalem sə, de war kə jep war mo, mo dee nkaa cìn ɗak kərem mbə cicinsə.

²⁶ Dang Jerusalem de nə ndəən dengnaan, baa war a kərem kas, war a nəən fun.

²⁷ Bəət haal Naan sat nənee, <<Wii jeer, yi cìn retnyit. Wii de baa yii cam shwaajeel mə làa-làa

kas, mbəde mat demish ceen war, war kat jep mo des met mat de war tong ashak kə mish war.>>

²⁸ Yaksə, dyemnaa, mo mmun a jep de mo kə tuwap nkaa de wun a kaa Aizik sə.

²⁹ Gyet nyam nə, be lāa de gyet mo lāa wur a ndəən nan sə, wur shínjeel laa de gyet mo lāa wur a ndəən Riin. Nə aasə yaksə.

³⁰ Dang, mbii de mo ran nə ndəən bəət haal Naan nə sat a mbəmi? Nə sat nənee, <<A ceen kərem nə war kə lāa war nə, mbəde baa lāa kərem nə mmak sekop ashak kə laalu nə kas.>>

³¹ Mbəmənə dyemnaa mo, baa mun a kərem mo kas, dangbe mun a jeplu mo.

5

Katpee De Mun Kə Nə nDəən Kristi

¹ Mbii de nə le, dangbe Kristi wur pwat kə mun ndər Wàar kə nen Yahudi nə mo, a mbəkə mun dee di a nankáa sun azeen-nzeen. Mbəmənə, be wen kən sat nwun nee, wu dar balbal kaa nen de mo a nankáa sut sə. Taji wu baa wu shìn káa fuu, mbəkə wu baa wu dee di a kərem kas.

² Wen Pool, an nkaa sat nə wun nee, katdang wu yit mmee gurum can wun, be nə dee agaak nənee, << mbii de Kristi kə cìn mbə wun, be nə dee a buu mənə.

³ Wen kən rəbet kə koo a weyi man azeen-nzeen nə, katdang mee gurum waa rəbet kə mo can wur, be nə dee a təng kə wur gam koor wàar nə mo di jir.

⁴ Wun nen de wu pan nee, wuu dee a de ndəre nyit Naan, mbəde wuu tap kə wàar nə mo, be wu pwat kə káa fuu mo aku ndəən Kristi. Wuu dee a

ðepəpal ndəən ðeret ðe Kristi kə ten cìn mo mbə wun.

⁵ Dangbe mun nen ðe baa mu leyit a nkaa can kas, be ndəən Riin shi shinzeen be, muu tong a shi gongpee shi canciin mə ðe ndəre mə Naan.

⁶ Katðang mu ðee a ðeməndong kə Kristi Jesu, be baa nə kuđi mee koop nə kas, koo ðe mo can gurun, kə koo ðe baa mo can gurun kas, ðangbe mbii ðe nə kəkoop nə a shinzeen ðe nə kám sat ndəən wal.

⁷ Də nyam, be wun nkaa sekyeen ndəən pwoo ðeret nə hakyeng, ðangbe yaksə, be a me le ðang baa wu kuđi wuu mwaan ndəən zeen nə kas yi?

⁸ Baa a Naan ðewur pərep wun, a wur cí sekyeen nwun kas.

⁹ <<A rep yist lee nə le kə bred wup ði.>>

¹⁰ Dang mbəðe mun a ðeməndong ndəən Daa fun, be an shinzeen nee, baa pan fuu mo waa ðen ðyik kə mənə kas. Wen shinzeen nee, ngwe ðewur nək wun sə, koo ðewur a wii, be Naan nshín kar wur.

¹¹ Dang ðyemnaa mo, katðang an kən sat an satpwoo nə, can nə a təng, be a me le ðang ghan kən sat a nshwaajeel ðak yi? Katðang nə aasə, be moo shang mbii ðe nə le canshii ngurum mo ndəən shiyeepyoom Kristi.

¹² Nen ðe mo daampee nookđi nwun sə, wen fes nrəbet kə mo dəm pun sut kə mo ðee ði a meermuut mo.

¹³ Dyemnaa mo, Naan wur pərep wun, mbəkə taji wu ðee a kərem mo ndər wäär mə nen Yahudi mo kas, ðangbe, taji wu le kə katpee fuu nə, nə ðee a ar ðe wun ncìn mbii ðebish mə nan ði kas. Dangbe nə ret kə wu walnshak kə bamshak zak.

14 Mo gam wàar nà mo jir a ndəən pwoos desə nənēe, <<A wal ngənanng fwaa kaa sak sə.>>

15 Katdang wun ndēe a kaa luwaayil de moo seshak sə, be wu tap taji wu tu shak kyes kədang-ndang.

Wu Tong nDəən Riin Naan

16 Wen kən sat nwun nee, wu mwaan ndəən Riin, mbəkə taji wu gam dʏen mə nan nà kas.

17 Mbəde mbii denan nà kə rəbet, be baa mo a nciit kə mbii de Riin nà rəbet kas. Kəzak, mbii de Riin nà rəbet be baa mo a nciit kə mbii denan nà rəbet kas. Mbii devəl sə mo baa moo rəbet shak kas. Desə nà de nēe baa wu mak cìn mbii de wuu rəbet kas.

18 Dang katdang wuu mwaan a ndəən Riin Naan, be baa wu kuɖi a ndər Wàar nà kas.

19 Dak de gurum moo cìn ndəən məse kə gurum, nà agaak. Kyeet kə dak mənə mo, a kaa cìn ngaa, dak debish mo, cìn mbii debish nen yitlwaan.

20 Seyil nkùm, dak soot, ciishak, jəər, zuur, tuup, rəbetkàa, bákshak, məse de nà a mə yilangpee.

21 Zuur debish, shwaayuur, kuur ashak debish mo, kə mbii debish mo de shini-shinə. Wen kən satpwoos nwun shibal, kaade gyet ghan kən sat nwun sə nà, nen de moo cìn mbii desə mo jir, be baa mon ncam del ndəən mulki Naan kas, koo dəben.

22 Dang dak de gurum moo cìn ndəən Riin Naan mo a, walnshak, kə retnyit, tongryang, gung mbii mo, naajeel nshak, cìn mbii deret mo, shinzeen,

23 sham kə kàa, yaasuk. Mbii desə mo jir, baa mee Wàar de nkaa mo kas.

24 Nen de mo a mə Kristi Jesu, mo kə ten pwas nan fur mo nkaa shiyeep ashak kə koor nà.

²⁵ Katđang mu tong a ndəən Riin, be nə ret kə mu mwaan ndəən Riin nə zak.

²⁶ Taji mu ɗiyeepkăa kas, kə taji mu le tuup nshak kas. Taji mu cìn zuur kə shak kas zak.

6

Wu Bamshak

¹ Dyemnaa mo, katđang mee gurum taa pal, be wun ɗe wun a ɗe balbal ndəən Riin Naan wu bam wur, mbəkə wur tuwap ɗe. Wu sham kə kăa fuu mo, kaade wun nkaa bam wur. Wu tap kə kăa fuu, mbəkə taji wun wu waa wu ɗel ndəən jwaan nə kas.

² Wu bamshak, katđang wu cìn aasə be wu gam Wàar Kristi mənə.

³ Katđang memee fuu lekăa wur a mee mbii, ɗangbe ndəən zeen nə, be baa wur a mee mbii kas, be gwar mənə nək a kaa shin bejee ɗak.

⁴ Dang nə ret kə, koo a wii be wur cam ɗak wur, ɗangbe wur nleshap shikăa shin, baa ashak kə ɗewur kám shin kə mee gurum kas.

⁵ Koo a weyi ndəən wun be wur mang toon kə mbii ɗewur cìn mo shikăa wur.

⁶ Koo weyi ɗewur nkaa lap kámpwoo Naan, be nə ret kə wur bək mbii ɗeret mo jir, ashak kə ngukám nə.

⁷ Taji mee gurum gwamkăa shin kas, mbəɗe baa mee ngwe cam zaal nNaan kas. Mbii ɗe gurum kop be wur ndyiip a nə.

⁸ Ngwe ɗewur kop a ndəən nan nwur, be wur ndyiip a mbii ɗewam ndəən nan nə. Dang ngwe ɗewur kop ndəən Riin Naan, be ndəən Riin be wur ndyiip a seen ɗe ngaa-ngaa.

⁹ Taji kwak fun mo waam mbə cìn mbii deret mo kas, mbəde katɗang pee nə wul, be mun ndyiip deret mə ɗak fun mo, ka baa mu taa mu muutleet kas.

¹⁰ Aasə, nə ret kə mu cìn mbii deret mo, kaade mu katpee nə sə. Mu cìn mbii deret ngurum mo jir, met jir, a ɗyemnəən fun mo, de mo a nendəm ndang Kristi mo.

Pwoo De Mə Kyes Nə Mo

¹¹ Ran denan-nan de wu naa sə mo, a an ran mo shi sar fen shindəm nwun.

¹² A nen de mo rəbet leshap ndəən nan desə, a moo rəbet letəng nwun, mbəkə wu can-can de, kəzak, mbəkə taji mo shwaajeel, mbə shiyeepyoom Kristi kas.

¹³ Nen de moo ten can mo, mo shikaa fur, baa mo kyeer wàar nə kas. Dangbe nə a rəbet kə mo, kə mo can wun, mbəkə mo katpee de mbə canpwoo nkaa wun ndəən nan.

¹⁴ Dangbe pee wen de be a shi shiyeepyoom Daa fun Jesu Kristi, a nə a mbii məndong de nə mmak le kə nghan canpwoo bejee ɗak. A mbə shiyeepmúut wur, be mbii de mə nyil desə mo, baa mo kuɗi mee koop nə pee ghan de kas. Nə dee a kaa moo ten pwas mo nkaa shiyeepmúut Kristi, kəzak, an a kaa ngwe de kə ten muut sə, har wen kən yit mbii mə nyil desə mo mbwoon.

¹⁵ Koo de mo can gurun, kə koo de baa mo can gurun kas, be baa nə kə mee koop nə kas. Mbii de nə kəkoop nə hakyeng nə ndesə, Naan wur shin seen depwoo mun.

¹⁶ Mbə de mo kə mwaan ndəən seen depwoo desə nə, be mo a nen Naan mo azeen. Moo

tongryang kə Naan kə wur naa mo shi yit naajeel zak.

¹⁷ Yool yaksə, be baa ɔyen nwen kə mee gurum daampee nwen zak kas, mbəde nəmer de mo nkaa an mo kám nə, an a kərem mə Jesu.

¹⁸ Dyemnaa mo, deret mə Daa fun Jesu Kristi nə tong ashak kə riin fuu mo jir. Nə a kəsə.

Manji Yiljep

Mupun New Testament

copyright © 2024 Initiative for the Translation and Development of African Languages and The Seed Company

Language: Mupun (Mwaghavul)

Contributor: Initiative for the Translation and Development of African Languages

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

- You include the above copyright and source information.

- If you make any changes to the text, you must indicate that you did so in a way that makes it clear that the original licensor is not necessarily endorsing your changes.

- If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-03

PDF generated using Haiola and XeLaTeX on 3 Jul 2025 from source files dated 3 Jul 2025

77a1013c-7c23-599f-9af1-1adbfc09489